



**JUNTA DEL VALLE DE AEZKOA
AEZKOAKO BATZARRE NAGUSIA**

31671 ARIBE (Navarra) · CIF: P3175000C
Tel: 948 76 43 75
jvaezkoa@infolocal.org
valledeaezkoa@gmail.com
www.aezkoa.org

Ariben, 2021eko urtarrilaren 22an, arratsaldeko zazpiak eta hogeita hamar minutuan, Aezkoako Batzarre Nagusiak, bilkura arrunta egin du, lehenengo deialdian, legez deituta, haren presidente titularrak zuzenduta eta jarraian adierazten diren kideak bertan zirela, eguneko honako gai hauek aztertzeko:

Eguneko gaiak:

BILDUTAKOAK

Batzarreburaia: Karlos Bueno Reka

Batzarrekideak: Eseberri Colomo, Maddi – Galarza Larrayoz, Maria Carmen – Martínez Juango, Ainhoa – Merino Iriarte, Juan Esteban – Reta Trevejo, Leire – Santomá Vicens, Gonzalo jaun/andereak.

LEHENA.- AURREKO BILKURAREN AKTA ONESTEA

Eragozpenik agertu ez denez, onetsita gelditu da 2020ko abenduaren 4ko akta.

BIGARRENA. 2021EKO AURREKONTUA

Aurkeztu da 2021erako aurrekontuaren zirriborroa, aurreko bileretan berrikusi zena; zenbait aldaketa egin dira kontu lerroetan, eta egituraketa orokorrari oniritzia eman zaio. Jauregiaren eraikina etorkizunean irekitzeko lan-egutegia doitu behar da, aurrekontu esleipena nahikoa dela egiaztatzeko. Toki Administrazioak berrikuspena eskatu duenez, eta otsailaren 1era arte atzeratu denez, mahai gainean utziko da dagokion txostena, baldin badagokio, izan arte. Aldaketa garrantzitsurik ez badago, zirriborro hau batzarrera aurkeztuko da, Batzarre Nagusiaren Ordenantza Orokorra zehaztutakoaren arabera.

HIRUGARRENA.- BAZKA-LARREEN KUDEAKETA ETA MANTENIMENDURAKO KONTRATUA

Larreen mantentze eta kudeaketa zerbitzuen kontratua esleitzeko lizitaziora aurkeztutako proposamenen berri eman da, prozedura sinplifikatuaren bidez eta Nafarroako lizitazio elektronikoko plataformaren bidez esleitu dena. Egindako zazpi gonbidapenetatik, bi eskaintza aurkeztu ziren: Iker lorea eta Laza SC. Kontratazio Mahaiaren aktak, prozeduraren garapena eta baldintza zehatzen agirian aurreikusitako atalei emandako puntuazioak aurkeztu dira.

Ebaluazioa amaituta, jendaurreko ekitaldian irekiko dira eskaintza ekonomikoak, emaitza honekin:

- 1- LAZA SC-k aurkeztutako eskaintza: 29.600,00 €
- 2- I. Loreak aurkeztutako eskaintza: 29.650,00 €

Eskaintza ekonomikoagatik lortutako puntuak (formula bidez neurtu daitezkeen irizpideak) eta proposamen teknikoagatik lortutakoak (irizpide subjektiboak), eta jarraian zerrendatzen den emaitza eman dute:

Lortutako puntuazioen laburpena	LAZA SC	I. LOREA
Puntuazio teknikoa, guztira	26,66	8,83
Eskaintza ekonomikoa	50,00	49,92
GUZTIRA	76,66	58,75

Kontratazio mahaiak erabaki du Laza SC enpresaren aldeko kontratazio proposamena egitea, hark lortu baitu puntuaziorik handiena, eta, kontratazioa arautzen duen baldintza pleguan xedatutakoaren arabera, esleipenerako proposatutako lizitatzaille gisa, baldintzen pleguko 13. klausulan adierazitako dokumentazioa aurkezteko eskatu zaio. Dokumentazio hori Batzarre Nagusi honen bulegoetan aurkeztu zen 2021eko urtarrilaren 20an.

Batzarre Nagusiaren Osoko Bilkurak, lortutako puntuazioak ikusita, larreak mantentzeko eta kudeatzeko zerbitzuen kontratua Laza SC enpresari esleitzea erabaki du, eskaintako prezioan (hogeita bederatzita mila eta seiehun euro gehi BEZa). Esleipena aurkeztutako eskaintzari eta onartutako baldintza pleguari lotuta egonen da.

Esleipen hori lizitatzailleei jakinaraziko zaie, eta 10 egun naturaleko epean etenda geratuko da, esleipenaren jakinarazpena bidaltzen denetik edo, hala badagokio, kontratazioaren arloko erreklamazioa jartzen denetik zenbatzen hasi eta erreklamazioa ebatzi arte.

EFPLren 102.1 artikuluan xedatutakoaren arabera, esleipena Nafarroako Kontratazioaren Atarian eta Administrazio honen iragarki ohelean eta webgunean argitaratuko da, kontratua esleitu eta hogeita hamar eguneko epean.

LAUGARRENA.- ADMINISTRARI LAGUNTAILEA KONTRATATZEA

Osoko Bilkurak onartutako oinarrien arabera, izendatutako epaimahaiak pertsona bat hautatu du eszedentziagatik hutsik gelditutako lanaldi erdiko administrari laguntzailearen lanpostua betetzeko. Hiru pertsonak aurkeztu zuten eskaera, baina horietako bat ez zen probetara joan. Hautaketa urtarrilaren 20an egin zen: probak egin eta horietan guztietan lortutako puntuazioak batu ondoren, epaimahaiak losu Dufur Otegi kontratatzea proposatu zion Batzarre Nagusiari, puntuazio handiena lortu zuen hautagaia izateagatik. Kalifikazioen banakapena epaimahaiaren aktetan jasota dago.

Batzarre Nagusiak epaimahaiak proposatutako pertsona kontratatzea onartu du, aurrez ezarritako baldintzetan. Erabaki hori hautaketa prozesuan parte hartu dutenei jakinaraziko zaie. Deialdia arautzen duten oinarrietan xedatutakoarekin bat etorritik, hautatutako izangaiak gehienez ere astebeteko epea izanen du lanpostuan sartzeko, deialdia egin duen administrazioak proposamena onartu eta interesdunari helarazten dion egunetik zenbatzen hasita. Lanean hasten ez bada, behar bezala justifikatutako kasuetan izan ezik, edo berriro hutsik geratzen bada, deialdia egin duen administrazioak hurrenez hurren kontratatutako ahal izanen ditu eskaintako kontratazioarekin ados daudela adierazten dutenak, lortutako puntuazioaren hurrenkerari jarraikiz.

BOSGARRENA.- JAUREGIKO ASEGURUAREN KONTRATUA

Batzarre Nagusiak hiru konpainiari eskatu zion jauregiko eraikineko asegurerako aurrekontua eta estaldurak, edukitzailea eta edukia barne. MAPFRE, Lagun Aro eta Helvetia konpainiek aurkeztu dute proposamena. Eskaintzekin batera doazen estaldurak eta baldintzak berrikusi dira, eta osoko bilkurak uste du MAPFRE enpresak aurkeztutako eskaintza osatuena dela,

estaldurei dagokienez, eta preziorik onena ere eskaintzen duena; beraz, erabaki du konpainia horrekin kontratatzea jauregiaren eraikinerako aseguru poliza, edukizailerako eta edukirako eskaintako baldintzetan. Urteko prezioa 1.135,76 €-koa da.

SEIGARRENA.- 4 HARANEN LOGOA BERRITZEKO PROPOSAMENA

Batzarreburu jaunak jakinarazi du Irati lurak dituzten lau haranen artean egindako azken bileran, Poctefa proiektuaz hitz egiteko, erabaki zela proiektua gauzatzearekin sortu den harremanari eustea. Horretarako, eta SASCIRATI proiektuko jarduketan barruan, logoaren diseinu berria egin da lau bailaretan Irati eremuarekiko nortasun komuna izateko. Logo berria gaur egungoa baino modu dinamikoagoan erabili ahal izateko diseinatu da, alternatiba eta konbinazio ugari ahalbidetzen baititu. Proposamen hori egungo logoa oinarri hartuta eta lauburuarekin konbinatuz egin da. Lauburuak lau bailarak islatzen ditu.

Asmoa da lau erakundeen artean lanean jarraitzea, proiektu komunak egiteko eta batera sustatutako proiektu horietarako berariazko laguntzak eskuratu ahal izateko. Gaur, aurkeztutako logoa onartu eta, ondoren, gobernantza komun batean aurrera egitea da helburua. Oraintxe bertan planteatu da eskualdearen argazkiak biltzen dituen liburuxka bat diseinatzea, azoka espezializatuetan aurkeztu ahal izateko. Osoko Bilkurak erabaki du proposatutako logoa onartzea eta POCTEFA proiektuan parte hartu duten gainerako erakundeekin lanean jarraitzea.

Informazio gisa, akta honetan jaso da logoaren diseinua, barnean hartzen dituen testu ugariekin batera:



ZAZPIGARRENA.- EXPLORA SAREA

Batzarreburu jaunak azaldu du Nafarroako Explora sarea espazio berezien, ibilbideen eta abarren alde egiteko elkarrekin delako, haien kudeaketa eta balioaren zabalkundea errazteko balio duela, guneen jasangarritasuna sustatu dadin. Haren helburu zehatzak dira, besteak beste, Nafarroan lurralde garapen jasangarria lortzen lagunduko duten estrategiak ezartzea, trebakuntza sustatzea, material komunak diseinatu eta prestatzea, zerbitzuak komunean kontratatu ahal izatea, sentsibilizazio kanpainak bultzatzea, ekintzaitza eta enplegu berdea bultzatzea, eta abar. Badaude sare hori osatzen duten espazioetara espresuki bideratutako diru-laguntzak.

Batzarre Nagusiaren Osoko Bilkurak adierazi du prest dagoela sare horretan parte hartzeko, baina erabaki du, lehenik eta behin, Irati osatzen duten gainerako erakundeek jakinaraziko zaiela erabaki hori, azter dezaten ea eraginik izan dezakeen balizko eta etorkizuneko gobernantza komunean, eta, bereziki, Zaraitzuko Batzordeari, bera baita Nafarroan integratuta dagoen bakarra eta sare horretan sartzeko interesa ere izan baitezake.

ZORTZIGARRENA.- ADMINISTRAZIO ELEKTRONIKOAREN ERABILERA ARAUTZEKO ORDENANTZA

Azken urteotan, administrazio publikoen esparruan, teknologia berrien erabilera bermatzera bideratutako zenbait arau egiten ari dira, barne-funtzionamenduan zein herritarrekiko harremanetan eragina izanen dutenak. Ordenamendu juridikoa ildo horretako aginduak ematen ari da pixkanaka. Herri Administrazioen Araubide Juridikoaren eta Administrazio Prozedura Erkidearen 30/1992 Legeak jada jasotzen zuen administrazio publikoek beren jarduera garatzeko eta eskumenak baliatzeko teknika eta baliabide elektronikoen, informatikoen eta telematikoen erabilera eta aplikazioa bultzatzeko betebeharra. Ondoren, Herritarrek Zerbitzu Publikoetan Sarbide Elektronikoa izateari buruzko ekainaren 22ko 11/2007 Legean, herritarrek administrazio publikoekin bitarteko elektronikoen bidez harremanetan jartzeko duten eskubidea aitortzen da. Legeak administrazio publikoek informazioaren teknologiak lege honetako aurreikuspenen arabera erabiltzeko duten betebeharra garatzeaz gain, informazioa kudeatzen duten datuen, informazioen eta zerbitzuen eskuragarritasuna, osotasuna, benetakotasuna, konfidentzialtasuna eta kontserbazioa ziurtatzera behartzen du.

Azkenik, Administrazio Publikoen Administrazio Prozedura Erkidearen urriaren 1eko 39/2015 Legean eta Sektore Publikoaren Araubide Juridikoaren urriaren 1eko 40/2015 Legean jasotako erregulazio berria urrats erabakigarria da Administrazio moderno eta informazioaren gizartean erabat integratua lortzeko bidean, eta herritarren eta administrazio publikoen arteko harremanean eredu berri bat proposatzen du, haien erregulazioa honako hauen erabileran oinarrituta: Administrazioekin harremanetan jartzeko komunikabide elektronikoenak.

Lege-xedapen honen ardatz nagusia herritarrek administrazio publikoekin bitarteko elektronikoen bidez harremanetan jartzeko duten eskubide orokorra aitortzea da. Administrazio publikoek, halaber, eskubide hori behar bezala egokitu behar dute, eskatzen diren berme guztiekin gauzatu ahal izateko.

Une honetan, Batzarre Nagusia administrazio elektronikora egokitzeko prozesuan dago, Egoitza Elektronikoa sortu da, eta urratsak ematen ari dira dagokion programa eta ekipamendua instalatzeko. Administrazio honen esparruan bitarteko elektronikoen erabilera bermatzeko, beharrezkoa da ordenantza bat onartzea, honako hauek arautzeko: administrazio elektronikoa garatzeko printzipio orokorrak, herritarren eta Batzarre Nagusiaren arteko bitarteko elektronikoen bidezko harremanak arautzen dituzten eskubideak eta betebeharrak, eta administrazio jardueraren esparruan eta, bereziki, administrazio prozedurak izapidetzean bitarteko elektronikoenak erabiltzearen baldintzak eta ondorioak.

Administrazio elektronikoa arautzen duen ordenantzaren proposamena aurkeztu da, eta Osoko Bilkurak onarpena eman dio, aho batez eta legezko kide kopuruaren gehiengo osoz, Batzarrera bidaltzeko, Ordenantza Orokorrean ezarritakoaren arabera. Testua luzea denez, osorik argitaratuko da web-orrian, deitzen den Batzarrearen aurretik eskuragarri egon dadin. Batzarreak alegaziorik ez aurkeztea erabakitzen badu, hasierako onespeneraren iragarkia Nafarroako Aldizkari Ofizialean argitaratuko da, Toki Administrazioari buruzko uztailaren 2ko 6/1990 Foru Legearen 325. artikuluan xedatutakoarekin bat, eta espedientea Idazkaritzan jarriko da 30 egun baliouduneko epean, iragarkia argitaratu eta hurrengo egunetik zenbatzen hasita. Herritarrek eta interesdunek hitzarmena aztertu eta alegazioak egin ahal izanen dituzte.

BEDERATZIGARRENA.- HAINBAT

1- Ezpelzaintza

Turismo Abaurrea-Abaurregainako Hilarriak-ek aurkeztutako idatzia. Ezpelzaintza 2050 Aezkoa izenekoa bailarako herritarren artean ezagutarazteko jardunaldi bat proposatu du. Ezpelak Cydalima perspectalis pipiaren izurritetik babesteko proiektua da, eta erakutsi du tresna eraginkorra dela pipiaren hedapena geldiarazteko. Jakinarazi du 2020an egindako jardueren memoria idazten ari direla, eta kopia bat igorriko diotela Batzarre Nagusiari, beti ere horrek egungo egoerak eskatzen duen azpiegitura sortzen laguntzeko egokia dela ikusten badu.

Batzarre Nagusiaren Osoko Bilkurak proiektu honetan laguntzeko prest dagoela adierazi du, eta aurreikusitako kostu ekonomikoen txostena eta egin nahi diren jardueren gidoia eskatzea erabaki du.

2- Turismo arloko bilera

Jakinarazi da bailarako turismo arlokoekin bilera bat egiteko deialdia egin dela den ostegunerako, hilak 28. Bilkuran 2020. urteko txostena aurkeztuko da.

3- AEK-ren proiektua: Praktikatua eta bizi

laz mintzapraktikarako talde bat sortzeko eskaera egin zen, eta aurten AEK-k Praktikatua eta bizi proiektua jarriko du martxan; eskualdean egindako zundaketa batean, hogeitabat laguneko talde batek, eta hamahiru pertsona inguruk Agoitzen, jarduerarako interesa izanen lukete. Proiektu hau eskualdeko euskara teknikariek landu da eta talde horiek dinamizatzeaz arduratuko liratekeen langileak kontratatatu behar dira. Jarduera honen aurrekontua, prestatzen ari dena, zerbitzuaren urteko jardueretan sartzen da. Osoko Bilkurak ontzat eman du aurkeztutako proposamena.

4- Euskararen normalizazioa eta foroak.

Euskara Batzordeak jakinarazi du, alde batetik, Pirinioetako Mahaian lantalde bat ari dela lanean, aurrez aurreko foroen bidez, euskara dinamizatzeko, eta, orain arte deituak izan ez badira ere, inguruko Euskara teknikariek bilera horietara joan behar dutela uste da; bestetik, egiaztatu da pandemian zehar euskararen erabilera nahiko utzia izan dela oro har, eta gai hori oso larria dela, lehentasunzat jotzen dutelako. Horri dagokionez, Añamendi Mankomunitaterako bi lanposturen deialdia aipatu da. Lanpostu horietan B1en pareko ezagutza maila eskatu da; uste dute jarduera horiek guztiak berrikusi behar direla eta euskara sustatzeko hizkuntza politikarekiko konpromiso handiagoa eskatu behar dela.

5- Udalbiltza

UDALBILTZA, Ikerketa Programatik, EHUKo ikasleen bidez egiten den eta Batzorde honetan duela urte eta erdi aurkeztu zen energia elektrikoari buruzko ikerketa amaitzen ari da. Hasierako gauzatze aurreikuspenak atzeratu dira, eta, amaitzen denerako, eskatu zaie proposamen bat egin dezatela Aezkoako Kultur Ola kudeatzeko eredu baterako, Herri Kooperatiben bidez, ekimen askotarako gauzatzen ari diren mikrokooperatiben eredu bidez. Udalbiltzatik

jakinarazi dutenez, pertsona bat (ikaslea) prest dago azterketa egiteko eta Batzarre Nagusiari proposamen bat aurkezteko, kosturik gabe.

6- Egur loteak

Nafarroako Gobernuko Baso Zerbitzuko langileek plano bat aurkeztu dute Gibelea aldean datozen 5 urteetarako aurreikusitako egur ateratzeak agertzen dituenak. Planoan, baita ere, 2020ko planeko lotea ageri da, bi enkantetan hutsik gelditu baitzen. Beharrezkoa litzateke egungo pisten zatiren bat konpontzea eta beste zati berri bat egitea, lote guztiak ateratzeko.

Saltzeke dagoen loteari dagokionez, bilera egin da bi zur erosleekin, eta eskaintza bat aurkezteko interesa agertu dute; baina uste dute Batzarre Nagusiak epe berri bat jakinarazi beharko liekeela zur erosle guztiei, lote hori erosteko eskaintza egin dezaten, eta egun berean eskaintzak jendaurrean ireki eta lotea nori esleitu erabaki dezaten. Osoko Bilkurak erabaki du jakinarazpen bat bidaltzea gogoraraziz interesdun guztiek eskaintza ekonomiko bat aurkez dezaketela lote horretara, Nafarroako Toki Administrazioari buruzko uztailaren 2ko 6/1990 Foru Legearen 166.3 artikuluan ezarritakoaren arabera, eta, horretarako, epe bat irekiko da, 2021eko otsailaren 5eko 13:00ak arte. Ondoren, egun horretarako deituko den osoko bilkuran aztertuko da.

7- Pirinioetako Mahaia

Jakinarazi da lantalde guztiak martxan daudela eta azpitalde batzuk ere sortu direla zenbait gai zehatzetarako. Gizarte Ongizate, Osasun eta Berdintasun Departamentuak Pirinioetarako berdintasun teknikari bat kontratatzea eskatuko du. Aurki, talde guztiei garatzen ari diren lanen laburpen bat eta talde aktiboen zerrenda bat igortzea aurreikusita dago, herritarrak parte hartzera anima daitezten. Batzarre Nagusiak uste du erakunde horren ordezkari bat ere sartu behar dela talde bakoitzean.

8- Aezkoako Udalen eta Batzarre Nagusiaren arteko bilera

Duela bi egun Batzarre Nagusiko eta haraneko udaletako ordezkariak bilera bat izan zuten (udal bakar bateko ordezkaria ez zen joan). Bertan, bi mankomunitateetan egiten diren lanei buruzko informazioa eskatu zen, eta Bidausiren txostena ez zen aurkeztu, ordezkaria ezin izan zelako bertaratu. Añamendi Mankomunitateari dagokionez, jakinarazi zuen ekitaldi honetarako aurreikusten dutela Nafarroako Gobernuak finantzaketa txikiagoa emanen zuela, eta, beraz, Batzarre Nagusiarentzako eta udalantzako kuotak handituko direla. Bestalde, arazoak daude erakunde horretako idazkaritza lanpostua iraunkortasunez bete ahal izateko. Horregatik, beste lan batzuekin batera egiteko aukeraz hitz egin da, lanpostu hori lortzeko aurkezten den pertsonentzat egonkorragoa izan dadin.

Cedernak hauteskunde deialdia eginen du, Aezkoako Batzarre Nagusiaren osaketa berri eta, Zuzendaritza Batzorderako Aezkoako ordezkari berria aukeratzeko. Elkartekideek 2021ean ordaindu beharreko kuoten banakapena jaso da jada, bai eta elkartearen proiektu propioen proposamen bat ere, baloratu eta bozka daitezten. Azken gai horri dagokionez, proposamen guztien gaineko ikuspegi orokorra egitea aurreikusi da, geroko bozketari begira.

Bileran Musika Eskolaren eta Guraso Elkartearen laguntza eskaerei buruz ere hitz egin zen. Udal gehienek ez dituzte jarduera horiek finantzatzeko, baina batzuek, aldiz, aurreikusita dute. Erakunde horiekin bildu behar da, eskaerak aztertzeko. Bestalde, Aezkoako Diagnostikoari buruz hitz egin zen. Dokumentu

hori une honetan ez da publikoa, amaitzen ari delako; elkarrizketaren bat egitea eta transkripzioak amaitzea falta da, eta aurkezpen ofiziala egitea aurreikusi da dena amaitzen denean.

HAMARGARRENA.- GALDERAK ETA ESKEAK

Ez da galde-eskerik egin.

Eta aztertzeko gai gehiagorik ez dagoenez, bilkura bukatutzat eman da goian adierazitako eguneko hamarrak zirela.